

28 DEC 2002

PAS DALANG KEPADA BANYAK DEMONSTRASI, KATA DR MAHATHIR

KUALA LUMPUR, 28 Dis (Bernama) -- Datuk Seri Dr Mahathir Mohamad hari berkata PAS adalah dalang kepada banyak demonstrasi yang diadakan di negara ini.

Perdana Menteri berkata kerajaan tahu mengenai penglibatan PAS sebagai dalang dalam demonstrasi-demonstrasi sebelum ini.

Dr Mahathir menyatakan perkara ini ketika diminta mengulas dakwaan Menteri Besar Terengganu Datuk Seri Abdul Hadi Awang kononnya demonstrasi secara aman oleh 160 nelayan dan petani membantah kenaikan gaji serta elaun Menteri Besar, exco dan Adun, sebagai didalangi oleh Umno.

Kumpulan itu mengadakan demonstrasi di hadapan Wisma Darul Iman, Kuala Terengganu, dua hari lepas.

"Dia boleh tuduh...Kita (juga) boleh tuduh semua demonstrasi didalangi oleh PAS. Dulu ada demonstrasi bukannya mereka nak berdemonstrasi tetapi ada dalang dan dalangnya adalah PAS...kita (kerajaan) tahu," kata Dr Mahathir.

Perdana Menteri bercakap pada sidang media selepas mendengar taklimat persiapan negara sebagai tuan rumah bagi sidang kemuncak NAM XIII yang akan berlangsung di Pusat Dagangan Dunia Putra (PWTC) mulai 15 hingga 28 Feb depan.

Timbalan Pengerusi Badan Perhubungan Umno Terengganu Datuk Idris Jusoh semalam menafikan tuduhan Abdul Hadi dan berkata Umno Terengganu tidak tahu menahu mengenai tindakan kumpulan berkenaan.

--- BERNAMA

AKT AFY MOZ